

CORINTOMO ITE CRISTONA #NOT#NOMO PABLO NANO ORETAGA RABE

Corintomo ite creyentiaimo Pablo cartana orede

1-2 Corinto railla nairaimo ite creyentia, ¿nie isoidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue llollena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoina jai marebicaitate. Jusiñamui omoina fetode, naimie iena. Ua nana cai Nama Jesucristona sedadinodicaidi Jusiñamui iena. ³ Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaia omoina uri jai itatatiamaia. Iena omoi uiñocana mai omoi jai.

Cristo muidona Jusiñamuimona ailluena feiñotocai

⁴ Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoina jai duenaite. Ie jira naimiemo omoi facaina iobillacinona jaca fecadicue. ⁵ Jusiñamui omoina duenaillamona, ie rafuena omoi llollena, naimiemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoina eo canode. Omoina naimiemo ite rafuena raise uiñotade. ⁶ Ie muidona Cristo rafuena raise #notomoi. Cristo rafuena cai jino llamona,

naimiemo raise #nofidomoi. ⁷ Ie muidona Jusiñamuimona omoimo jaca buena fiebiñede, naimie dibeimo omoi raise maijillena. Naimie dibeimo omoi raise maijiamona, naimie dibeimo jiaie creyentiaina raise itatacana jaidomoi. Cai Nama Jesucristo abido billemo iocire omoi ocuirillanona, Jusiñamuimona ailluena rafuena feiñotomoi. ⁸ Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoina duere finoñeite. Naimie bia, naimacimo jeacino nia illa jira, naimiena #noñedinona duere finoite. ⁹ Jusiñamui ie lloga uaina jaca finoite. Naimie #nogamie. Naimie Jitona omoi nabaillena omoina fetode. Naimie Jitodi cai Nama Jesucristo.

Naimaci comeciai daje isoi lloñedinaci

¹⁰ Cue amatiai, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciai daje isoi lloillana jitaidicue. Daje isoi omoi comeciai facajana jitaidicue. ¹¹ Cloé raillamie cominimona bie rafuena cue fidia jira, iese omoimo lloticue. “Omoi comeciai daje isoi iñedomoi” naimie llote. ¹² Omoimona damierie raitomoi: “Dani Pablo llofuia dibecinodo jai jaidicai”. Damierie raitomoi: “Dani Apolos raillamie llofuia dibecinodo jai jaidicai”. Damierie raitomoi: “Dani Pedro llofuia dibecinodo jai jaidicai”. Damierie raitomoi: “Dani Cristo llofuia dibecinodo jai jaidicai” raitomoi. Nana iese itomoi. Iemona omoi comeciai daje isoi iñedomoi. Cloé cominimona iese fididicue. ¹³ Ero, diga omoi Jilloitaraini

iñede. Omoï jeacïnomona omoï jillobillena, dama Cristo illa. Omoï facaina cruzmo cuedi fiodaiñedicue. Cue dibeimo omoï illena cue bautizañegaomoï. ¹⁴ Omoïna cue bautizañena jira, omoïmo ite rafue cuemona comuiñena jira, iobidicue. Dama Crispona bautizadïcue. Gayona jiaï bautizadïcue. ¹⁵⁻¹⁶ Estéfanos jofomo ite comïnina bautizadïcue. Jiaïe comïnina cue bautizajana comeciñedicue. Ie muidona: “Pablo facaina bautizadïcaï” llonidomoï. Daje isoï omoï comeciïaï lloiñenia, cue muidonañede. ¹⁷ Ailluena comïnina cue bautizallena, Cristodi cuena oretañede; iadedi naimïe rafuena cue llofuellena, cuena oretate. Eo abïna uiñoraïma isoï omoïmo cue llofueticuedena, cue lloga rafuemo omoï comeciïaina facañedomoï. Ie jira eo abïna uiñoraïma isoï omoïmo llofueñedicue. Cristo fiodaïllamona, omoï jeacïnomona naimïe omoïna jillotate. Iena omoï feitañenana jitaidicue.

Cristo fïnoca rafuemonã Jusiñamui uai siñonana uiñoticaï

¹⁸ Cristona ñnoñedinomona cruzmo Cristo fiodaïlla rafuedi jamaïfue. Naimacidi faïficana jai jaidimaci. Jusiñamuimona naie rafue illa jira, caïmona naie rafuedi siño. Naie uaidi diga comini comeciïaï meidorede. Caidi naie rafuena ñnotinodicaï. ¹⁹ Ero, Jusiñamui facaina lloraima micori Cristona ñnoñedinona jaie cuete: Jusiñamui llote: “Abïna uiñoraïni imaci uiñuacïnona saitaiticue. Abïna baitadïno imaci baitajacïnona saitaiticue” llote. Ie muidona naie isoide comini jilloñenana jai uiñoticaï.

20 Naie isoide comini uiñuacinomona jaca jillonidicai. Abi uiñoraíma uiñuacinodi Cristo fiodailla rafue baífemo faíñede. Moisés micori ciegafuena uiñoraíma uiñuacinodi Cristo fiodailla rafue baífemo faíñede. Uaina uaitatimie birui ite uiñuacinodi Cristo fiodailla rafue baífemo faíñede. Jusiñamuidi naimiena uiñoñedinu imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñotícaí. 21 Ie jitaillacino diese Jusiñamui finua jira, naimaci abi uiñuacinomona naimiena ñnoñedinuimaci. Ie jira naimie mare jitaillacinomona, naimiena ñnotinona jai jillotate. Naimaci jeacinomona naimacina jai jillotate. Cristo rafuena cai llumona ñnotimaci. Jusiñamuina ñnoñedinodi naie rafuena: “Jamaifue” raitimaci.

22 Siño rafuena naimaci cioacana jira, judíuairaila cominidi iese raitimaci: “Siño rafuena Jusiñamui finua, omoi lloga rafuena ñnoitícaí” raitimaci. Grieguairaila comini dinena raitimaci: “Omoi lloga rafuena cai abina uiñuacino ie isoi itena, iena ñnoitícaí” raitimaci; 23 iadedi Cristo rafuena llocana jaidicai. Cruzmo naimie jai fiodaillana llotícaí. Ie jira judíuairai cai lloga rafue muidona iciritimaci. Naiena oiacañenano iciritimaci. Damie naimaci illaimana jaillemo ocuridimaci. Naimaci ocurillamie fiodaillamo naimaci comeciaina facañedinuimaci. Cristo fiodailla jira, raitimaci: “Naimiedi cai ocuriñenamie” raitimaci. Judíuairañedinu dinena raitimaci: “Omoi lloga rafuedi jamaifue” raitimaci. Ailluena comini cai lloga rafuena jitañedinuimaci; 24 iadedi Jusiñamui damierie

judúuaina jai fetode. Dajerie judúuainēdinona jiai jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiai uiñotimaci. ²⁵ Jusiñamui Cristona orede, cai jeacino facaina naimie fiodaillena. Jusiñamuina inoñedinomona Cristo finoca rafuedi jamaifue. Ebinidifue. Caimona Cristo finoca rafuedi Jusiñamui inoñedino uiñuacino baifemo faite. ²⁶ Cue amatiai, Jusiñamui omoina navui fetode; iadedi ¿nie isidomoi? Jamai bue isidomoi. Omoi comeciaina iemo faca. Jusiñamuina inoñedinomona abina uiñoñedomoi. Omoi creyentiai dibeimo eo abi uiñotino raise iñedimaci. Omoi creyentiai dibeimo illaicomini raise iñedimaci. Omoi creyentiai dibeimo ucuberedino raise iñedimaci. Jusiñamui ie isoidinona eo fetoñede; ²⁷ iadedi abina uiñoñedino raillanodomoina fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena. ²⁸ Jamai bue isoidinona fetode, jamai bue isoiñedino baifemo faillena. Jusiñamuimona jamai bue isoiñedinodi jamai comini. ²⁹ Ie muidona jaca buna Jusiñamui uicomo abina iedoñena. ³⁰ Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñotikai. Cristo fiodailla jira, Jusiñamui cai jeacinona feitate. Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate. ³¹ Jusiñamui facaina lloraima micori iena jaie cuete: “Bu abina iedoiacania, nana Cristo finoca

rafue diga naimie abina iedua” cuete.

2

Pablodí cruzmo Cristo fiodailla rafuena llocabite

¹ Cue amatiai, omoi dine navui cue rillamona, Jusiñamuimona cue feiñoga rafuena llofuetícue. Omoi baifemo eo abina uiñotícuenedena, iese niade llofueñedícue. ² Daje rafuemo cue comecina facacabidícue. Ie jira omoimo dama Jesucristo rafuena llofueiacadícue. Cruzmo naimie fiodailla rafuena llofueiacadícue. ³ Omoi motomo navui cue ia, meiruioicaillamona jacinaioidícue. Jusiñamui facaina cue raise jino lloñeni raillano jaciruioidícue. ⁴ Comini abi uiñuacínodo omoimo llofueñedícue; iadedí omoi jeacínomona omoi jilluamona, Jusiñamui Joreñodí omoína cue lloga rafue siñonana uiñotade. ⁵ Jusiñamuidí cue iese llofuiana jitaide. Comini abina uiñuacínona omoi cajamona, Cristona ñnoñedomoi; iadedí Jusiñamui omoína jillotaja jira, jai ñnotomoi.

Jusiñamui Joreñodo bie rafuena uiñotícaí

⁶ Comini abi uiñuacínodo llofuecabiñedícue; iadedí Jusiñamuimona ite abi uiñuacínodo llofuetícue. Cristona raise ñnofidinomona abi uiñuacínodo llofuetícue. Cristo facaina llorainidí cue isoi jiai llofuecabitímaci. Cominimo jai ite uiñuacínodo llofueñedícaí. Illaicomini uiñogacínodo llofueñedícaí. Ico faífitímaci. Ico jiai uainicaitímaci. Ie jira naimaci uiñogacínodo llofueñedícaí; ⁷ iadedí Jusiñamuimona abi uiñuacínona cai feiñuamona, iedo llofuetícaí. Nano dofoconi, enirue nia finoñenia, naimie comeci

iena uiñote. Monamo naimie ebirede illanomo
ico cai illena jitaide. Iena jaie cai uiñoñedicaí.
Jusiñamui jaca buna iena jaie uiñotañede. ⁸ Birui
ite illaicomini di Jusiñamuimo ite rafuena nia
uiñoñedimaci. Iena uiñotimacidená, cruzmo cai
ebirede Namana meineñedimaci. Naimie uai
ebirede. Nana ra naimie jai finua jira, naimie uai
siño. Jusiñamui rafuena raise uiñoñedimaci; iadedi
Jusiñamui caina iena uiñotade. ⁹ Jusiñamui facaina
lloraima micori iena jaie cuega:

Jaca buna naimiena inotino facaina Jusiñamui
finoca rafuena cioñede.

Jaca buna iena cacaiñede.

Jaca buna iemo comecina facañede

cuega. Jusiñamui rafuena uiñoñedinó naie rafuena
jaca uiñoñeitimaci; iadedi naimiena isiruitino naie
rafuena uiñotimaci. ¹⁰ Birui Jusiñamui caina iena
uiñotade. Ie Joreñodo caina uiñotade. Ie Joreño
naga rafuena uiñote. Nana Jusiñamui comecimo
iticinona jiai uiñote.

¹¹ Jaca budi jiaimie comecimo iticinona
uiñoñede. Dama naimie iena uiñote. Ie
isoide. Jaca budi Jusiñamui comecimo iticinona
uiñoñede. Dama naimie Joreño iena uiñote.

¹² Jusiñamuimona ie Joreñona jai feiñoticaí. Jiaie
cominimona naie Joreñona feiñoñedicaí. Jusiñamui
Joreñodi caina Jusiñamui caimo caidiñeno fecaca
rafuena uiñotade. ¹³ Omoimo naie rafuena
llofuecabiticaí. Cominimona fueoga uaido
llofueñedicaí; iadedi Jusiñamui Joreño caimo
llofuia uaido llofueticaí. Ie jira Jusiñamui Joreño
ite cominimo naie rafuena llofuecabiticaí.

¹⁴ Jusiñamuina inoñedinodi Jusiñamui Joreñomona
iticinona feiñoñedimaci. Naimacimona naie

rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci. ¹⁵ Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa comini illa rafuena jiai raise uiñoñedimaci. ¹⁶ Jusiñamui facaina lloraima micori iena jaie cueba: “Jaca buna Jusiñamui comecimo iticinona uiñoñede. Budi naimiena jiai llofuenide” cueba. Ero Cristo comecimo iticinona cai uiñua jira, Jusiñamuina ñnoñedinodi caina raise uiñoñedimaci. Caina jiai llofuenidimaci.

3

Danomo Jusiñamui dibeimo maijidimaci

¹ Cue amatiai, Jusiñamui Joreño anamo itinona omoi raise itomoidena, omoina llofueñedicue. Omoi jitaillacinodo nia omoi jailla jira, omoina llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaina omoijailla mei, Cristo rafuedo eo jaiñedomoi. ² Feinide rafuena navui llofueticue. Eo feirede rafuena omoimo llofueñedicue. Omoina iena nia llofueñedicue. Omoi uruiai janore moonaila mei, guitimaci. Ie isoide. Cristona cai ñnua mei, naimie rafuena ñnocana cai jailla; iadedi omoi raise jaiñena jira, Jusiñamuimona nia moonaiñedinoino isoidomoi. ³ Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciai daje isoi lloñedinomoi. Jusiñamuina ñnoñedinoino isoi nia itomoi. Jamai ebe isoi nia itomoi. ⁴ Omoimona damierie: “Pablo llofuia

dibecinodo jaidicai” raitomoi. Jiaino: “Apolos rail-lamie llofuaia dibecinodo jaidicai” raitomoi. Iese omoi raia, Jusiñamuina ñnoñedino isoi itomoi. Ie jira iese raiño.

⁵ Jamai bue isoidicue. Apolos jiai jamai bue isoide; iadedi Jusiñamui dibeimo coco maijiamona, Cristo rafue coco llofuiamona, iena ñnotomoi. Jusiñamui cocomo llua isoi, ie rafuena lloticoco. ⁶ Naie rafuena cue llofuiamona nano ñnotomoi. Ie mei Apolos iena dane llofujete. Iese llofueuidicoco; iadedi dama Jusiñamui omoina naie rafuena ñnotacana jaide. ⁷ Ie muidona naiemona cai fueua. Jamai bue isoidicoco. Jusiñamui coco bai femo faite. Ie jira naimie omoina ñnocana jaitate. ⁸ Daje uaina Apolos diga maijidicue. Coco maijia diese Jusiñamuimona coco ibana feiñoticoco. ⁹ Jusiñamui facaina maijidicoco; iadedi naimiedi omoina ñnocana jaitate. Naimiedi omoi comeciaina marena itatacana jaitate. ¹⁰ Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue llamona Cristona ñnotomoi. Birui jiaimie omoina naie rafuena jai llofujete. Omoi comeciaino naie rafue raise itabillena, omoina llofujete. Bu omoina llofueia, omoi comeci marena illacinomo naimie comeciina facajanona, omoina naimie llofuecabilla. ¹¹ Omoi jeacinomona omoi jilloillena, jaca daje rafue ite. Jiaie rafuedi ññede. Iena omoimo jai llofueticue. Naie rafuedi Jesucristona ññaite. ¹² Iena raise atona bu llofueia, uanaicinona jaca llofuiamona, cominina Cristona ñnocana jaitate.

Naie rafuedi naimaci comeciáimo raise itabide. Iena raise atona bu llofueñenia, uanaicinona jaca llofueñenia, cominina Cristona inocana jaitañede. Naie rafuedi naimaci comeciáimo raise itabiñede. ¹³ Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina majidino llwana lloite. Naimaci llogacinona eo facacite. ¹⁴ Ie mei Cristo rafuena raise atona llotinodi Jusiñamuimona ibana feiñoitimaci. ¹⁵ Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jai faifitimaci; iadedi faifñeitimaci. Jusiñamui diga jaca iitimaci; iadedi tainomo majidimaci.

¹⁶ Jusiñamui ie illano omoi comeciáimo illana uiñotomoi. Naimie Joreño omoimo illa jira, Jusiñamui ie illanodi omoi creyentiai. ¹⁷ Cristo dibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie dibeimona omoina itatatimiena duere finoite.

¹⁸ Bie rafuedo omoi raise jaillena, dani omoi abiaina jifueñeno. Creyenteñedino uiñuacinodo jaiñeno. Omoimona bu iedo jaiacania, naimiemo llono: “Naie isoide rafuedo o jaiñeno”. Iedo naimie jaia, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedino uiñuacinodo omoi jaiñeno. ¹⁹ Jusiñamuimona naimiena inoñedino uiñuacinodi jamaifue. Jusiñamui facaina lloraíma micori jaie cuega: “Jusiñamuidi comini abi uiñuacinona uiñuanona,

naimacina jai emodofide. Naimacina jai duere finode”. ²⁰ Jiai cuega: “Jusiñamuidi abi uiñotino railla comini imaci comeciai facajacino jamaifuena uiñote”. ²¹ Ie jira omoi llofuerañiri abi iedoño. Jusiñamuimona nana rafue omoi mo jai illa jira, naimaci abi uiñuacinodo abina iedoño. ²² Marena omoi comeciai illacino jitai raillano, Cristo omoi dine caina oretate. Cueno oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoi mo ite rafuedi suide. Omoi jitai raillano, jiaruido nana omoi mo iite rafuedi suite. Nia omoi fioidañenia, Cristo omoi na canoite. Omoi fioidaia, naimie dine jaitomoi. Naiemona marena omoi comeciai illacino jitai raillano, ua nana rafue omoi mo jai ite. ²³ Cristomo omoi jainaia illa jira, naimie anamo itomoi. Jusiñamuimo Cristo jainaia illa jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

4

Cristo fetocano naimie dibeimo maijide

¹ Caimo omoi comeciaina faca. Cristo dibeimo maijidicai. Jusiñamui rafuena llocana jaidicai. Iena jaie uiñoñedicai; iadedi naimie caina uiñotaga rafuena birui llofueticai. ² Ero, naga patrōdi naimie dibeimo maijidino naimie lloga uaina ñnuana jitaide. Ie isoide. Jusiñamuidi ie facaina lloraini naimiena naimaci ñnuamona naimie rafuena raise lluaña jitaide. ³ Cue uaina omoi uaitañenia, iena omoi uaitaia, jiaño iena uaitaia, iemo comecina facañedicue. ⁴ Cuemo nicino

ia, iena uifioñedicue; iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite. ⁵ Ie jira: “O llucino mare” cuemo lloñeno. “O llucino marañede” cuemo jiai lloñeno. Cai Nama nia abido biñenia, iena cuemo omoi lloñeno. Naimie bia, nana comini comeciaino ite rafuena uifioitaite. Naimaci comeciaino ite jitaillacinona uifioitaite. Iemona naimaci maijia dinori Jusiñamuimona iobillacinona feifioitimaci. Naie facaise cuemo ite rafuena lloite. Ie jira nia cuemo lloñeno.

⁶ Cue amatiai, naie rafuena omoi raise uifioñena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina ciegafue llua isoi, omoi illana jitaidicue. Omoi llorainiri tainomo iobiñeno. Omoi Cristo facaina llorainimona damie jiaie lloraima baifemo faiamo omoi comeciaina facañeno. ⁷ Nana omoi llofuerainidi daje isoidimaci. Jusiñamuimona nana naimacimo ite uaina feifioitimaci. Dani naimaci comeciainona iena naimaci ofiena jira, ie diga abina iedoñeno.

⁸ “Nana Jusiñamuimona iticinona jai feifioiticaí. Jusiñamuimona nana cai jitaillacinona caino jai ite. Jusiñamui sedajanomo illainina isoi jai iticaí” omoi comeciaina facadomoi; iadedi nia iese ifiedomoi. Nainomo itomoidena, nainomo coco jiai illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue. ⁹ Jusiñamuidi nana omoína cue baifemo faitatate raillanomo cue comecina facadicue. Cristo rafuena llorainidicaí; iadedi cue baifemo omoi faiamo cue comecina facadicue. Omoimona jamai fue isoidicaí. Nana comini

duere cai illamo raise eruaidimaci. Jusiñamui jaienisaidi duere cai illamo jiai eruaidimaci. ¹⁰ Cristo rafuena cai llua muidona, omoimona ebe isoidicai. “Cristo rafuena raise inuanona, iedo raise jaidicai” raillanomo omoi comeciaina facadomoi; iadedi Jusiñamuimona iese inedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese inedomoi. Omoimona jamai bue cai isoilla jira, cairi jaisitomoi. “Jiaie comini cairi iobidimaci” raillanomo omoi comeciaina facadomoi; iadedi Jusiñamuimona iese inedomoi. ¹¹ Cai guille buedi jaca inede. Iniroinidicai. Jiaie comini caina duere finodimaci. Jofonidicai. ¹² Cai ra ollena, cai onolli diga duere maijidicai. Comini caina jeare ñaitimaci; iadedi ibana oñedicai. Naimaci diga marena ñaiticai. Caina duere finodimaci; iadedi uai oñeno ibana oñedicai. ¹³ Cai joreña jeare ñaitimaci; iadedi cai dinena naimaci diga marena ñaiticai. Naimacimona jamai bue isoidicai. Iese caimo naimaci comeciaina facadimaci; ia Cristo dibeimo ie rafuena nia llocana jaiacadicai.

¹⁴ Bie carta cue cuiamona, omoina meiruitaia-caiñedicue; ia omoina nia llofueiacadicue. Isiruiga uruiaidomoi isoidomoi. Ie jira bie rafuena omoi raise uiñuana jitaidicue. ¹⁵ Omoina Cristo rafuena llofuellena, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruiaina jai jaidomoi isoidomoi. ¹⁶ Ie jira omoimo cue llogacinodo mai omoi jai.

¹⁷ Iedo omoi jaillena, omoina canollena,

omoi dine Timoteona jai oredicue. Naimiena isiruiticue. Naimiedi Cristo ie ñnogamie. Cuemona Cristo rafuena naimie cacajanona, iena ñnote. Ie jira naimiedi cue jito isoide. Creyentiai illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoïna llofuede. ¹⁸ “Pablo caina jaciruilla jira, naimie cai dine biñeite” raillanomo omoi comeciaina facajamona, omoïmona damierie jai abina biridomoi. ¹⁹ Iese comeciaina facadomoi; iadedi Jusiñamui jitaia, omoi dine raire jaiticue. Ie mei nie isoide uai naie abina biridinomo illana uiñoiticue. Naimaci ñaiacinodo iena uiñoñeiticue; iadedi naimaci finoca rafuemonona iena uiñoiticue. ²⁰ Ero, jamai ñaiamona, Jusiñamui anamo naimie jitailla isoi iñedica; iadedi naimie finoca rafuedo cai jaillamona, naimie jitailla isoi iticai. ²¹ Omoi dine ico cue ria, ¿niese omoi diga ñaiticue? Cuemo llono. Cue lluna omoi ñnoñenia, omoïmo riire lloiticue. Cue lluna omoi ñnoia, omoïna cue isiruillamona, omoïmo fecuise lloiticue. Ie jira cuemo llono.

5

Pablo eo jearede rafuena finodimiena riire llote

¹ Jiaie rafuena omoïmo lloiticue. Eo jearede rafue omoi motomo jai illana jai fididicue. Jusiñamuina ñnoñedino naie isoide rafuena finodimaci; iadedi omoïmona damie ie eicañona ote, ie aina. ² Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunañedomoi? Omoi rocabillacomo naimie bia,

naimie fo billana rairui. ³ Omoi dine iticuedena, bie rafue dani omoi siadollena, omoi danomo ofillena lloticue. Omoi dine cue iñena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uiñoticue. ⁴ Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite. ⁵ Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo dibeimo dane iite. Cristo ico abido bia, naimiedi Cristo dibeimo dane raise illa jira, Cristo naimiena duere finoñeite.

⁶ Jearede rafue omoi motomo illa jira, ¿buena abina iedotomoi? Janorede siritate ra juilliruaimo faiamona, nana naie juilliruai sircana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa. ⁷ Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciaino ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judíuai cominidi toica llaudaiaí fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira

jeacinona finocana cai jaiñeno. ⁸ Cai facaina Cristo fiocalla jira, cai jeacinona faionocaillanona, Jusñamui jitailla isoi mai cai i. Jeacinona finocana cai jaiñelli. Uanaicnodo mai cai jailli.

⁹ Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai iniñede iñiaai diga itinañuai diga nabairiñellena lloticue. ¹⁰ Nibai iena raise cacaiñedomoi. Ie jira iena dane lloticue. Cristona inoñedinona ñaiñedicue. Naimaci aiñede riñoniai diga ia, naiñaiñuai iniñede iñiaai diga ia, naimaci rana nicidoia, rana naimaci fiaa, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo Jusñamuina uiñoñedino illa jira, ¿ninomo niadedi iticai? ¹¹ “Cristona inoticaai” raitinona ñaiticue. Naimaci aiñede riñoniai diga naimaci ia, naiñaiñuai iniñede iñiaai diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci ficabia, naimaci diga nabairiñeno. Naie isoidino omoi jofuemo feiñoño. ¹²⁻¹³ Cristona inoñedinona ñaiñedicue. Naimaci rafue cuemo duiñede; iadedi maraiñedicinona naimaci finoa, Jusñamui naimacina duere finoite; iadedi Cristona inotino maraiñedicinona finoa, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

6

Cristona inoñede juezmo jiaie creyentena llogidoño

1 Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaí dine jaiñedomoi, naicinona siadollena? ¿Bue ñellena Cristona ñnoñede juez dine naimiena meiruiñeno llogidotomoi? 2-3 Jesucristo abido bille mei, Cristona ñnotinodicaidi Cristona ñnoñedinona duere sefuillena lloiticai. Taife comini duere sefuillicinona ico jiai lloiticai. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi? 4 Nicino omoimo ia, ¿bue ñellena Cristona ñnoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci. 5 Omoi meidaillena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena. 6 Iese finocabiñedomoi; iadedi nicino omoi creyentiaimo ia, Cristona ñnoñedimiemo jiaie creyentena llogidocabitomoi.

7 Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñeno anamo ee. Naimiemona omoi duere sefua, dama ite. 8 Iese iñedomoi; iadedi dani conini jiaie creyentiaina duere finocabidomoi. Naimaci rana fiñdomoi. Omoi amana duere finodomoi.

9 Jusiñamui sedajanomo naimiena ñnoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraína sedacabidino, daje isoide iima diga

conima aifiedotino, daje isoide riño diga coninho aifiedotino, ¹⁰ rana bainino fucabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñeitimaci. ¹¹ Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

Jearede rafuemonabina rairui

¹² Cristo dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiaie iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i railano. Dani Cristo rafue anamo cai illi. ¹³ Raitomoi: “Nie isoide guille cai guiacania, nie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetailafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. ¹⁴ Cristo fodaite; iadedi fodaillamona, Jusiñamui na ie abi diga naimiena jillotate. Cai fodaia, ie uaido na cai abiaie diga caina

ico jillotaite. Cai abi jaca illa jira, jearede rafuena birui cai finoñena.

¹⁵ Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno. ¹⁶ Ie aiñede riño diga bu ia, ie ai illa isoi, jai dajena jaidiaimaia. Ie jira Jusiñamui jaie llote: “Riño diga ima illa jira, jai dajena jaidiaimaia” llote. ¹⁷ Cai Nama Cristomo bu duia, dajena jai jaidiaimaia. Jusiñamui Joreño iaimaiaimo illa jira, iaimaia comecei daje isoi jai lloide.

¹⁸ Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie marañede rafue bu finoia, naimie abimo jearede rafue finoñede. ¹⁹ Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentia. Jusiñamuimo jai jainaiaidomoi. Ie muidona omoi jitaillacinodo jaiñeno. ²⁰ Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

7

Pablodi ima ie aina ua rafuena ñaite

¹ Dajerie rafue cuemo jicanollena, carta cuemo navui oredomoi. Iena ja ñaiticue. Ima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiai mare; ² iadedi jeacino omoi finoi raillano, nagamie ie aina otene, jiai mare. Nagañaiño ie inina otene, jiai mare.

³ Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena.

⁴ Naiñaiño abi dañone; iadedi daño ie ini abimo jiai duide. Naimie abi damañede; iadedi dama ie ai abimo jiai duide. ⁵ Ie jira: “Danomo iniñeitico” lloñeno. Jusiñamui diga o raise ñaillena, naimiemo o comecina raise o facallena, iemo omico comeci daje isoi lloillamona, diga irui illamona danomo omico iniacaiñenia, jiai mare. Naie facaise fuilla meinomo riño diga o iacanamona, dane danomo ini, Taife omicomo ramo fai raillano.

⁶ Dane lloiticue. Jeacinona omoi fino raillano, nagamie ie aina otena, mare. Nagañaiño ie inina otena, jiai mare. Iese omoimo lloticue; iadedi iese ocuiñedicue. ⁷ Ainidicue. Cue illa isoi omoi illana jitaidicue; iadedi daje isoiñedica. Jusiñamui caina itataja diese iese itica. Dajerie ainidimaci. Dajerie airedimaci. Dajerie inidimaci. Dajerie iniredimaci.

⁸ Nia ainidinomo lloiticue. Nia inidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare; ⁹ iadedi omoi ocuiñeniadedi, aina ono. Jiaie riño diga illemo o comecina facañellena, daje riñona ono, o aina. Jiaie imamo o comecina facañellena, daje imana ono, o inina.

¹⁰ Creyentiammo nia lloiticue. Airedinomo lloiticue. Iniredinomo jiai lloiticue. Cue uaido lloñedicue; iadedi cai Nama jaie llote: “Riño ie inina sofeño. ¹¹ Ima ie aina sofeño” llote. Iese llote; iadedi nie riño ie inina sofeia, jiaie imana naiñaiño oñena. Imana naiñaiño oiacania, ie ini diga dane abido illasa.

12 Nia lloiticue. Cai Nama buena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono. 13 Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiena dotaño” naiñaiño llono. 14 Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaïmaiaï uruiaïna, jaie creyente iaïmaiaï uruiaï isoi, omoi roracomo feiño. 15 Ie inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaïllena rairuiño” naimiemo llono. Ie aina creyenteñede ini sofeiacania: “Naimiena dotaño” naiñaiño llono. “Naimie jaïllena rairuiño” naiñaiño llono. Sofeia mei, jai dajemo duiñediaïmaiaï. Jusiñamui naga creyente uri illana jitaide; 16 iadedi ie ini diga ie ai fiebia, ie ini creyentenamona, naiñaiño nibai creyentena jaite. Ie ai diga ie ini fiebia, ie ai creyentenamona, naimie nibai creyentena jaite.

17 Iena lloticue; iadedi Jusiñamuïmona ie feiño ga uaido nagamie jaïlla. Creyentiaïna omoi jaïlla facaiseconi, omoi maïjuïlla ramo nia raise omoi maïji. Naga creyentiaï illanomo buena llofuecabiticue. 18 Nia creyentiaïna omoi jaiñenia, judúaï isoi omoi mona dajerie omoi abiaïna

detatatomoi. Naie detatafuemo omoi comeciaina birui facañeno. Omoimona dajerie omoi abiaina nia detatañedomoi. Iemo omoi comeciaina birui facañeno; ¹⁹ iadedi Jusiñamui uaina omoi ñnuamo omoi comeciaina birui faca. Jiaie rafue baifemo faite. ²⁰ Creyentiaina omoi jailla facaiseconi, omoi maijuilla ramo nia raise omoi maiji. ²¹ Creyentiaina omoi jailla facaise omoimona dajerie patrón anamo itinodomo. Nia patrón anamo itino isoi omoi jai. Iemo omoi comeciaina jarire facañeno. Jiairuido omoi patrón: “Cue anamo ñnedomoi” raia, naimie anamona oni omoi jai; iadedi Cristo rafuedo jaca omoi jai. ²² Cristona omoi ñnua facaise, patrón anamo omoimona damierie navui itomoi; iadedi Jusiñamui omoina fetode. Naimiena omoi ñnuamona, omoi jeacino anamo jai ñnedomoi. Patrón anamo omoimona damierie navui ñnedomoi; iadedi Jusiñamui omoina fetode. Ie jira naimie anamo jai itomoi. ²³ Omoi jeacino facaina Jesucristo fiodailla jira, Jusiñamui omoi jeacina oni dotade. Iena jai feitate. Naimie cominina jai jaidomoi. Ie jira comini jitaillacino anamo ñeno; iadedi Jusiñamui jitaillacino anamo i. ²⁴ Cue amatai, creyentiaina omoi jailla facaiseconi omoi maijuilla ramo nia raise omoi maiji. Jusiñamui omoina canuanona, jearede rana omoi maijiñenia, nie isoide rana omoi maijia, Jusiñamuimona mare.

²⁵ Navui cuemo cartana oredomoi. Faidaiñuai illa rafuena uñoiacadomoi. Cai Nama naie rafuena jaie lloñena jira, iena birui lloiticue. Naimie cuena duenailla jira, naimie uaina ñnoticue. Ie muidona comini ñnogamiedicue. ²⁶ Birui duere

omoi sefuilla facaise illa jira, omoi illa isoi omoi i. ²⁷ Omoimona bu airenía, naiñaiñoña dotañena. Bu ainia, dama ainide. Riñoña oñena; ²⁸ iadedi o aina illena ininide riñoña o otiodena, jeacinona finoñedio. Omoimona o inina illena ainide iimana o otiodena, jeacinona finoñedio; iadedi aina bu ua mei, inina bu ua mei, eo duere maijite. Iese omoi duere sefuiñellena, omoimo iena lloticue.

²⁹ Cue amatiai, biemo omoi comeciaina faca. Jesucristo abido dane billirui iairei ite. Naimie jitailla rafuena omoi raise finollena, omoi ainiamo ite rafuemo omoi comeciaina facaja; iadedi Cristo rafuemo omoi comeciai eo facaja. ³⁰ Omoimona damierie sunaia, damierie caimare ia, iemo omoi comeciaina eo facañeno. Damierie raruiaina ibaia, naieri eo iobiño. ³¹ Omoimona damierie bene ite rana ebiruitimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

³² Omoi comeciai jarire iñenana jitaidicue. Nia ainidimie abi juarede, dama Cristo rafuena maijillena. Naimiena iobitaiacade; ³³ iadedi airedimie bene ite rafuemo ie comecina facade. Ie aina iobitaiacade. Naiñaiño ite rafuemo naimie comecina facade. Cristo rafuemo ie comecina jiai facade; ³⁴ iadedi mena rafuemo ie comecina eo facallemo abi juanide. Ininidiñaiño abi juarede, daño Cristo rafuena maijillena. Nana naiñaiño comecimona naimiena iobitaiacade; iadedi inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

³⁵ Aina uana rairuiñedicue. Inina uana jiai rairuiñedicue; iadedi omoi raise illena, naie ra-

fueña lloticue. Cristo rafuedo omoï raise marena jaillana jitaïdicue. Dani Cristo rafuemo omoï começiaïna facajana jitaïdicue.

³⁶ Ero, omoïmona naiñaiño oiacaga ïmamo ie moo, ie jisa caïdiñeno fecaca. Naiñaiño jai moon-ailla jira, naiñaiño jitailla jira, naiñaiño feca. Fecaïa, ie moo jeacïnona finoñede; ³⁷ iadedi ïnina naiñaiño oiacañena, naimie começi llumona, ie começina eo facajamona, ie jisa fecaacañena, jiaï mare. ³⁸ Ie jisana fecaïa, mare. Cristo rafuena naiñaiño eo maijïllena, ie jisa fecañena, jiaï mare.

³⁹ Jiaïe rafuena lloticue. Riño ie ïni nia fiodaïñena, naiñaiño naimiemo jaca duide. Ie ïni fiodaïlle mei, jiaïe ïmana ie ïni ifomo naiñaiño oiacania, mare; iadedi creyentedïmïena naiñaiño ua. ⁴⁰ Naïe feciñodi ïmana ie ïnina oñena, naiñaiño abi juarenite, Cristo rafuena eo maijïllena. Ie muidona ïnirediñaiño baïfemo caïmare iite.

8

Jusiñamuina eruaïde jiraraïmo llicisi fecaja rafue

¹ Cuemo cartana navui oredomoi. Jusiñamuina eruaïde jiraraïmo fecaca llicisina jïcanotomoi. Naïe isoïde llicisidi omoï rïana uiñoïacadomoi. Iena ja ñaiticue. Naïe jiraraïna naimaci navui sedaja jira, omoïmona damïerie naïe isoïde llicisi rïana: “Maraiñede” raitimaci. Creyentiaïmona Jusiñamuina eruaïde jiraraï jamai rana illa jira, damïerie naïe llicisi rïana: “Mare” raitimaci. Bu iese uiñoïa, mare; iadedi iena uiñoamona naimie abi iedoïa, naimie começina raise facañede. Iena naimie rïa, jiaïe creyentiaïmo começina facañede. Jiaïe creyentiaïna bu isirua,

naimacimo ie comecina facade. Cristo rafuedo jiaie creyentiaie raise jaillana jitaide. ² “Eo abina uiñoticue” ie comecina bu facaia, nia eo raise abina uiñoñede; ³ iadedi Jusiñamuina ua cai isiruillamona, jiaie creyentiaina cai isiruia, jai abina uiñoticaie. Jusiñamui dinena caina jiaie uiñotaacade.

⁴ ¿Niese Jusiñamuina eruaide jiraraimo fecaca llicisina ñaiticaie? “Jusiñamuina eruaide jirarai jaca cajeñenana uiñoticaie” raitomoi. “Jusiñamui jaca daje. Iena uiñoticaie” raitomoi; ⁵ iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci. ⁶ Iena sedacabidimaci; iadedi cai daní Jusiñamuina sedacabidicaie. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

⁷ Jusiñamuina eruaide jiraraidi jamai rana nana creyentiaie uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci ríia: “Naie jirarai sedadicaie” naimaci comeciaina facadimaci. Naie rafue naimaci raise uiñoñena jira: “Jecinona finodicaie” raitimaci. ⁸ Ero, nie isoide llicisi cai ríamona, llicisi cai ríñenamona, Jusiñamui caina feiñoñede. Naimiena cai inuamona caina feiñote. Buena cai ríñenia, buena cai ríia, jecinona finoñedicaie. Naiemona marecinona jiaie finoñedicaie. ⁹ Naie llicisina ríredomoi; iadedi omoi ama níbaie Cristo díbeimo raise iñede. Naie llicisi omoi ríia, naimiemona jecinona jai

finodomoí. “Jusiñamuina eruaide jiraraina omoí nia sedadomoí” raillanomo naimie comecina facaite. Iena naimie comecina facajanona, Cristo díbeimo raise jaiñeite. Abido danomo naimie dane jaite. ¹⁰ Nibaí abina uiñotomoí; iadedí Jusiñamuina eruaide jiraraí illanomo omoí guillena omoí jailla jira, omoína nia Cristo díbeimo raise iñedimie cioia, nainomo jiaí guisaite, comecina facajano: “Cue ama Jusiñamuina eruaide jiraraina nia sedaja jira, naiena jiaí nia sedaiticue”. ¹¹ Omoí ama abido danomo jaia, omoí muidona. Cristo naimie facaina fiodaite; iadedí omoí finoca rafue muidona, omoí ama abido danomo jaite. ¹² Iese omoí finoia, omoí amana jeacinona finotatomoí. Naimie comecina ocuiñotañedomoí. Ie muidona Cristomo jeacinona jiaí finodomoí. ¹³ Cristomo jeacino cue finoí raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

9

Cristo facaina lloraínidí naimaci jitailla rana jamai feiñua

¹ Cue jitaillacinona finoredicue; iadedí Jesucristo jai oretagamiena cue illa jira, naimie jitaillacinona finoacadicue. Cuenajaie fetua facaise caí Nama Jesúna cidicue. Creyentiaína omoí jailla jira, caí Nama facaina cue maijiana uiñotomoí. ² Jiaie comini Jesucristo oretagamiedicuenabaí uiñoñedimaci; iadedí omoí iena uiñotomoí. Cristona omoí iñua jira, Jesucristo cuena oretajana uiñotomoí.

³ Cue llofuiacinona bu uaitaia, iese cue llofuiacinona riidotícue. ⁴ Jesucristo rafue lloraimana cue illa jira, omoí díne cue macaria, cue jitailla rana cuemo jamai omoí illa. Jiaie rafuena cue maijiñena motomona cuemo jamai omoí illa. ⁵ Cue ai cuemo itena, omoí díne naiñaiño cue díga macaria, coco jitailla rana cocomo jamai omoí illa. Omoí díne jiaie Jesucristo oretagano naimaci ainiáiri macaria, omoí díne Jesucristo amatai macaria, omoí díne Pedro macaria, naimaci jitailla rana naimacimo jamai fecauidomoi. Ie jira, ¿níese cue jitailla rana cuemo jamai fecañeitomoi? ⁶ Jiaie llorainimo naimaci jitailla rana jamai fecacabidomoi; iadedi cue onolli díga cue maijiana nibai nia jitaidomoi. Bernabé ie onolli díga naimie maijiana nibai nia jitaidomoi. ⁷ Ero, soldadodi ie guille ibañede. Iena jamai feiñote. Naga illimo maijuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoí motomo cue maijia jira, cuena omoí nafuia, omoimo Cristo rafuena llocabitícue. ⁸ Jamai comini uaido naiena llofueñedícue; iadedi Moisés micorí ciegafuiaimona iena fueotícue. ⁹ Naimie micorí jaie cuega: “Jusiñamui llote: ‘Jurareta trigo oni juillena saisiia, iemona ie guillesa, ie fueña maiñeno. Maiñenia, ie maijia fueмона guite’ llote”. Ie isoide. Omoí motomo cue maijia fueмона cue jitailla rana cuemo jamai omoí illa. Iena Jusiñamui lloia, dama juraretamo ie comecina facañede; iadedi caimo ie comecina uafacade. ¹⁰ Cristo rafuena cue llofuecabilla jira, cue

llua fue mona cue jitailla rana jamai cue feiñua. Iemo ocuridicue. Ie isoide. Ie illimo bu maijia, naiemona riana ollena, nainomo maijide. Iemo ocuride. ¹¹ Omoi motomo Cristo rafuedo omoi raise jaillena, navui llofueticue. Ie jira cue jitailla raruia omoimona jamai cue ua. ¹² Omoimona raruiaina jiaie lloraini feiñocabilla jira, cuemona Cristo rafuena nano omoi cacaja jira, cue jamai jiai feiñua; iadedi omoimona raruiaina jicañedicue.

Cue jitailla raruia cue ollena, cue onolli diga duere maijidicue. Ie jira nana cue jitailla raruiaina oñedicue. Cristo rafuena omoi cacaiacaiñeni raillano, omoimona raruiaina jicañedicue. Raruiaina cue jicaia, omoi comeciaina nibai facaitomoi: “Raruia oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoimona raruiaina jicañedicue. ¹³ Ero, Jerusalémo judíuai comini Jusiñamuina sedauilla jofo ite. Nainomo naie comini toiniaina atuidimaci, Jusiñamuimo fecallena. Moisés micori jiaie llua isoi, naimaci jeacino facaina toiniaina fajanona fecadimaci. Nainomo maijuidino comini atica toiniaimona naimaci rillena, ibajanona ocabitimaci. Iena uiñotomoi. ¹⁴ Ie isoide. Cristo rafuena llorainidi naimaci rafuena inotinomona naimaci jitailla rana imaci ua. Cristo iena jai llote. ¹⁵ Omoimona raruiaina jaca jicañedicue. Raruia birui cue ollena, bie cartana jiai cueñedicue. Dama cuemo ite ra diga iiticue. Omoimona iena feiñoticuedena, meiruoicaida feiñoticue. Omoimona cue feiñoñena jira, omoi facaina Cristo rafue cue lluamona, abina iedoticue. Raruia cuemo jamai omoi fecaia, ¿niese abina iedoiticue?

16 Jiaie lloraini rana feiñua isoi cue feiñoia, Cristo rafuena cue llumona abina iedoñeiticue. Jusiñamui cuena oretaja jira, naie rafuena lloticue. Iena cue lloñenia, Jusiñamui cuena duere finoite.

17 Dama cue comeci jitaillamona Cristo rafuena cue lloiacania, Jusiñamuimona ibana feiñoiticue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidicue.

18 Ie jira, ¿niese ibana feiñoiticue? Ibana nibai feiñoiticue; iadedi omoimo Cristo rafue cue lloia, cuemona mare. Omoimona cue jitailla rana cue oñenia, cuemona mare.

19 Omoimona raruiaina cue feiñoñena jira, omoï anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ailluena cominina Cristo ðibeimo cue itatallena. Iese jaiñedicuedena, eo janore comini Cristo ðibeimo nibai jai itataticue.

20 Judíuai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo ðibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue.

21 Judíuaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiai jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiai jaidicue. Cristo lloga uaido jiai jaidicue. Naimacina Cristo ðibeimo itataiacadicue.

²² Naimaci diga cue nabairillena, Cristo rafuena nia raise iinoñedino diga cue ia: “Omoi baifemo Cristo rafuena uiñoticue” raiñedicue. Naimacina iciacaiñedicue, naimacimo jeacinona cue finoi raillano. Naimacina cue isiruillamona, naimacina canoacaducue. Naimacina Cristo rafuena raise iinuana itataiacaducue. Nana cominina cue canoacana jira, naimaci mare finocana uiga rafuedo jaiducue. Cue comecina facaducue: “Cue muidona damierie Cristona nibai iinoitimaci”.
²³ Cristo rafuena ailluena comini iñollena, iese jaiducue. Iena llocana jaiducue. Naimaci iñua jira, iobiducue.

²⁴ Ero, dani cai jitaillacinodo cai jaiñena. Iemona omoi fueollena, jiaie uaido lloiticue. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena iñocana mai cai jailli, ico Jusiñamui illanomo monamo ibana nana cai feiñollena. ²⁵ Naga aisidimie riire aisillena, ie abina mairitallena, ie abina eenote. Maïrillena, ie abina nagarui jiai facatacabite. Imana feiñollena, iese finode. Imana bu oia, dallu iobide. Ero, jeacinona cai finoi raillano, cai abiaina cai eenua. Naimie jitailla isoï cai illena, Cristo rafuemo jiai cai facacabilla. Monamo cai rillanona, ibana cai feiñollemo, jaca iobiticaï. ²⁶ Riire aisiacadimie ebena aisifede. Onolli diga mena iaïmaïaï jamai jifanoia, jafaicina jamai ducoifediaïmaïaï; iadedi conimana ducoidiaïmaïaï. Ie isoide. Cristo rafuedo raise cue jaiacania, jamai ebena jaiñedicue; iadedi nana cue comecimona iedo jaiducue. ²⁷ Cue comecina raise sedaducue. Dama Cristo rafue anamo iacaducue.

Dama iena ñnoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoï fueua.

10

Jiraraïna sedañena rafue

¹ Cue amatiaï, bie rafuena feitañeno. Cai jaiagai micoriaï finoca rafuemona fueoiticaï. Egipto railla eniruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiaïrede railla monaillai ruica naimaci jaiacania, Jusiñamuidi naie monaillai oni ñaijitate, safefodo nana naimaci ruica jaillena. ² Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci. ³ Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci. ⁴ Nainomo jinui jiaï iñena jira, Jusiñamui llua jira, Moisés micori noficina butajamona, toide jinuina nana jirodimaci. Naimaci ñine macaria, Cristona cioiñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide; ⁵ iadedi Jusiñamuina naimaci ñinoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaïna fioidaitade.

6 Cai jaiagai finoca rafuemona cai fueua. Maraiñede jearede rafuena naimaci finua isoi ebiruiño. Abimo omoi oño. 7 Jusiñamuiñediñena sedaño. Cai jaiagai mona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oño. Jusiñamuiñediñena omoi sedaño. 8 Naimaci jearede rafuena finodimaci. Naimacimona damierie naimaci aiñede riñoniai diga itimaci. Ie jira naimacimona daruidemo veintitrés mil comini fiodaitimaci. Jusiñamui naimacina fiodaitade. Naimaci finoca rafue isoi abimo cai oño. 9 Cai jaiagai mona damierie Jusiñamui Joreña ñaitimaci. Naimaci guisoiga radi Jusiñamui mona bite. Naiena ñiamona, Egiptomo ite guillemo comeciaina facadimaci. Ie muidona naimiñena ricaitadimaci. Ie jira Jusiñamuidi jaioniaina naimacina ainitate. Iemona ailluena fiodaitimaci. Naimaci finoca rafue isoi abimo cai oño. Jusiñamuina ricaitaño. Cristona cai nia iñoña facai finoca rafuemo cai comeciaina facaño. 10 Cai jaiagai mona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oño. Jusiñamui facaina lloraini joreñuaina cai ñaiño.

11 Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona.

12 Naie isoide rafue omoimo suiñellena, omoi

abaiaina rairui. Omoi comeciaina nibai facadomoi: “Cristona cai eo raise inua jira, iena finoñeitica!” comeciaina facadomoi; iadedi omoi abaiaina omoi rairuiñenia, jeacinona finoitomoi. ¹³ Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitaño. Jusiñamuidi inogamie. Ie muidona omoi comeciai ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi inoñellena, Jusiñamuidi omoina canoite.

¹⁴ Cue amatai, Jusiñamui omoina canuamona, Jusiñamuiñedimie facaina finoca rafuemona oni i. ¹⁵ Abina uiñotomoi. Ie jira omoimo cue lluacinona omoi cacaja mei, iemo omoi comeciaina omoi faca. ¹⁶ Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruana, janore llomeniconna guitica. Jusiñamuimo iobillacinona nano fecadica. Ie mei janore vino jirodica. Iena cai jiruamona, Cristona cai nabaillana uiñotica. Cruzmo Cristo fiodailla jira, naimiena nabaidica. Naie facaise llomeniconna cai tairuñuamona, naimiena cai nabaillana uiñotica. Cristo fiodailla jira, iese itica. ¹⁷ Diga creyentiaidica; iadedi daje llomenicomona jaca guitica. Daje llomenicomona cai guilla jira, dajena Cristomo cai duillana uiñotica.

¹⁸ Ero, judíuai railla cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. ¹⁹ Omoi illanomo Jusiñamuina inoñedimodi Jusiñamuina

eruaide jiraraimo guillena fecacabidimaci. Cai creyentiaidicaimona naie guilledì jamai guille. Naie jiraraidì jamai ra. Cajeñede; ²⁰ iadedì Jusiñamuina ìnoñedinomona jamai rañede. Naimacimona nanoca ra. “Temo rille cai fecajia, cai moona sedadicaì” raitimaci; iadedì naie ramo naimaci comeciaina facañedimaci; iadedì imaci moomo comecina facadimaci. Ero, Jusiñamuiñedimie mo comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoì jaia, Taife diga jai nabairitomoì. Taife diga omoì nabairillana jitañedicue. Taifemo omoì duillana jitañedicue. ²¹ Rollena omoì ofia, Cristo fiodaillana omoì comecillena, nainomo omoì jiruamona, nainomo omoì guillamona, Cristona nabaidomoì. Comini rafue òne omoì jaillamona, Taifena nabaidomoì. Cristo diga, Taife diga, daje facaina nabairinidomoì. Iese omoì finoia, maraiñede. ²² Iese omoì finoia, Jusiñamuina jai iciritaitomoì. Naimiena omoì icia, ¿niese naimie riicaillafuemona jilloitomoì? Jaca jilloñeitomoì.

Jiaie creyentiaina canocana cai jailla

²³ Ero, Jusiñamui òibeimo omoì illa jira, ¿niese dani omoì jitaillacinodo jaiacadomoì? Diga Jusiñamui rairuiñega rafue ite. Creyentiaì iena finorede; iadedì dajerie Jusiñamui rairuiñega rafuena cai finoñelli, naiemona buè cai ofena jira. Iena cai finoia, cai amana Cristo òibeimo itatañedicai. Iena cai finoia, cai amana Cristo rafuena ìnotacana jaiñeiticai. Naimiena ramo faicana uitataticai. ²⁴ Omoimona nagamie dama naimie mo ite rafuemo comecina facañena; iadedì

naga jiaie creyentemo ite rafuemo ie comecina jiai facaja.

²⁵ Ero, ninena o llicisina omoi ibaia, Jusiñamuiñedimiemo naie llicisina fecajana jicanoñeno; iadedi jicanoñeno iena jaricitaiñeno rino. ²⁶ Iena David micori jaie cuega: “Jusiñamui bie eniruena finode. Nana rana finode. Cai guillena, cai guille rana nana comuitaga” cuega. Ie jira ¿niese fimaiticai? Naimie mare finoca rana cai ríia, jeacinona finoñedicai.

²⁷ Ero, naimie diga o guillena Cristona ñnoñedimiedi ona uaidoia, naimie dine o jaiacania, naimie dine guisai. Nana omo ecaja guillena guiño. Jamai uainino guiño. “¿Ninena ibadio bie llicisina?” jicanoñeno. O comeci jarire finoñeno; ²⁸ iadedi Cristona raise ñnoñedimie nainomo jiai guitemo, omo lloia: “Bie llicisidi Jusiñamuiñedimiemo jai fecaca llicisi”, iena o riñeno. Iena o ríia, Cristona raise ñnoñedimie comecina facaite: “Jeaçinona finodio. Taifemo fecaca llicisina ritio. Creyentedimie iena riñede” comecina facaite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñeno. ²⁹ Naimie comecina facajacinodo cai jaiñenamona, nana Jusiñamui comuitaga guillena guiredicai; iadedi Cristona nia raise ñnoñedimiemona nana guinidicai; iadedi naimie comecina facajacinodo jaiñedicai. ³⁰ Cai guia, Jusiñamuimona naie guille comuitaja jira, Jusiñamuimo iobillacinona fecadicai; iadedi cai guillamona damierie cai joreña ñaiamona,

iena guiñeiticai. ³¹ Omoimo iena nia lloiticue. Nie isoide rana omoi guia, nie isoide rana omoi ríia, nie isoide rana omoi jiroia, nie isoide rafuena omoi finoia, naieri Jusiñamuina iobita. ³² Jusiñamuina nia ñnoñedino canocabi, naimie uaina naimaci cacaillena. Jusiñamuina jai ñnotinona jiaí canocabi, naimaci abido danomo uaiñellena. ³³ Buena cue finoia, nana cominimo cue comequina facadicue. Ie jira nagarui cue jitaillacinodo jaiñedícue; iadedí Cristo rafuena naimaci ñnollena, nana cominina canocana jaidícue.

11

¹ Cristo lloga rafuedo jai jaidícue. Cue isoi omoi jai.

Roracomo riñonia illa rafue

² Cuen a nia feitañedomoi. Cristo oretagano jaie llogacinona omoína llofuetícue. Cue llofueuilacinodo nia jaidomoi. Ie jira omoi iobidícue; ³ iadedí jiaíe rafuena nia lloiacadícue. Cristo ie Moo anamo ite. Naga iima Cristo anamo jiaí ite. Nagamie ai ie ñni anamo ite. Omoi afemo itino uaina omoi ñnoñenia, maraiñede. ⁴ Roracomo omoi comini oficabia, ie ñni anamo ie ai illa jira, omoi comini finocabilla isoi, naga riño ie ifogimo ñiroina bicuano jailla. Iese naiñaiño bicoñenia, ie ñni anamo naiñaiño ññede isoi eruaide. Jusiñamui diga nie iima ññaia, Jusiñamui uaina nie iima jino lloia, naimie ie ifogí icona jitañeno, Cristo anamo naimie illa jira. Naie facaiseconi ie ifogí icona jitajia, Cristo afemo itena eruaide. ⁵ Nie riño Jusiñamui diga ññaia, Jusiñamui uaina

nie riño jino lloia, ie ifogimo iniroina bicoñeno jaia, ima isoi naiñaiño iacana jira, ie ini afemo illana eruaide. Ie ini anamo iacaiñena jira, ie inino meidaitade. ⁶ Nie riño ie ifogimo iniroi bicoñeno jaiacania, ima isoi eruaillena, ie ifogidi rijiruda gareca. Iemona naiñaiño meidaillamona, ie ini anamo illamona, ie ifogimo iniroina bicuano naiñaiño jaite. ⁷ Jusiñamui diga naimie ñaia, Jusiñamui anamo naimie illa jira, ima ie ifogi icona jitañena. Jusiñamui naga imana comuitate. Imana naimie finuamona, naimiena cai iobitajamona, Jusiñamui cai afemo illana uinoticaí. Ie inina iobitajamona, naiñaiño afemo ie ini illa jira, riño ie ifogimo iniroina bicuana jailla. ⁸ Ero, Eva micorimona Adán micorí comuiñede; iadedi ie ini micorimona ie ciraiofemona naiñaiño micorí comuide. ⁹ Naiñaiño anamo illena naimie comuiñede; iadedi naimie anamo illena naiñaiño comuide. Naimie uai inollena, naimiena canollena, naiñaiño comuide. ¹⁰ Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiñona naimaci cuanona, Jusiñamui jaienisaímona jiai mare. ¹¹ Naga riño ie ini anamo ite; iadedi Cristona cai inua jira, riño baifemo imadi faiñede. Ima baifemo riño jiai faiñede; iadedi daiñaiñona conimana iaímaiaí canua. Cristo naga imana, naga riñona daje isoi feiñote. ¹² Naga comini Jusiñamui comuitaga. Nano fa-caiseconi Adán micorimona Eva micorina jaie comuitate; iadedi birui naga ima riñomona comuide.

¹³ Biemo omoi comeciaina omoi faca: Omoi roracomo Jusiñamui diga nie riño ñaia, omoi einamací finocabilla isoi, ie ifogina bicoñeno

jai, ¿niese omoi comeciadi raite? Cue comeci: “Maraiñede” raite. Ie ini anamo naiñaiño iñedena eruaide. ¹⁴ Nana omoi biesedena raicabitomoi: “Nie ima ie ifotirai eo areniadedi, cai cominimona maraiñeno cide; ¹⁵ iadedi nie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena sicotajamona, naiñaiño ifotie ie ifogina raise ibaide. ¹⁶ Iena jaca llofuecabiticue. Jiaie creyentiai illanomo cue isoi comeciaina lloidimaci. Omoimona bu cue llogacinona uaitaiacania, damamei ite.

Cristo fiodailla rafuena raise comeciñedimaci

¹⁷ Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena inocana jaiñedomoi; iadedi naiemona maraiñede rafue comuide. ¹⁸ Rollena omoi oficabia, omoi comeciaina daje isoi lloiñenana jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñaiacadicue. Omoi oficabia, nagamiiai guillena aticabidomoi. Mare; iadedi danomo guiñedomoi. Omoimona damierie ucuberena jira, dueredino diga guiacaiñedomoi. Omoi guille caididomoi. ¹⁹ Omoi iese illana jitaiñedicue; iadedi daje isoi omoi comeciaina lloiñenamona, Jusiñamui dibeimo raise itinodi uiñoga. Omoimona damierie danomo omoi guillamona, Jusiñamuina omoi isiruillana uiñoticaí. ²⁰ Cristona sedallena omoi oficabia, guitomoi; iadedi vino jiruanona, llomeniconna guillanona, cai Nama fiodailla rafuena raise comeciñedomoi. Maraiñede rafuena omoi finua jira, iena nia lloiticue. ²¹ Nagamiiai guillena

aticabidomoi. Dani coniniri raise guiñedomoi. Danirie omoi atica guillena guitomoi. Jiaïnona guillena iñedomoi. Damierie omoïmo ailluena guille ite. Damierie omoïmo guille raise iñede. Jiaïnona guillena omoi iñena jira, damierie jaca aimetaitimaci; iadedi jiaïno monidimaci. Damierie guilla motomo jiaï jifaidimaci. Conini nabaiñedomoi. Ie jirari Cristo fiodailla rafuena raise comecinidomoi. ²² Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jiaïnomo guille fecacaiñedomoi? Jiaïe creyentiaina omoi isiruiñenamona, Jusiñamuina jiaï isiruiñedomoi. Janore guille itinona duere finodomoi, naimacina omoi eacacaiñena jira. Iese omoi illa jira, omoi iobiñedicue.

Cristo fiodailla rafuena llofuiacino

²³ Navui omoïna biena llofueticue; iadedi omoi raise iñoñena jira, iena dane llofueiticue. Cai Nama iena cuemo jaie llote. Cai Nama Jesús ie gatatajarui facaiseconi, ie llofueoicaigano diga ia, naimaci guia, llomeniconona llinote. ²⁴ Iena llinuanona, Jusiñamuimo iobillacinona fecade. Ie mei iena tairuanona raite: “Mai, biena guiño. Bie llomenicodi omoi guillamona, cue fiodaillana omoi comeci. Cue fiodaillamona omoi jeacinomona jilloitomoi. Biena omoi guillamona cuena comeci. Bie llomenicodi cue abi facai ie. Cue llua isoi iena omoi finocabi” raite. Ie mei iena guitimaci. ²⁵ Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaise-mona cominina imaci jeacino facaina Jusiñamui duere finoñellena, toiniana atuidimaci, naimiemo

fecallena”. Iemo ie comecina facajano, raite: “Cue fiodaillemona, dama cue diaillemona, Jusiñamuidi omoimo jiaie rafuena birui llote. Omoi jeacinona oni dotajana llote. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raite. Ie mei jirodimaci. ²⁶ Naga icaiño Cristo facaina llomeniconna omoi guia, Cristo facaina vinona omoi jiroia, omoi jeacino facaina cai Nama fiodaillana uiñotomoi. Naimie nia abido dane bille dinori naiena comeci.

Cristo fiodailla rafuena raise comeci acadica

²⁷ Cristo fiodailla rafuena raise comeci. Naie llomeniconna Cristo rafuedo raise jaiacaiñedimie ebena guia, Cristo rafuedo raise jaiacaiñedimie naie vino ebena jiroia, iena jamaide. Naimie jeacinomona Cristo naimie jilluana naimie ñnoñena jira, Cristomo jeacinona finode. ²⁸ Jeacino omoi comeciaino illamo omoi comeciaina faca. Jeacino omoi comeciaino ia, iena guiño. Iena jiroño. Jeacino omoi comeciaino iñenia, iena guiño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro. ²⁹ Jeacino naimie comeciaino nia illamona, iena guia, iena jiroia, marañede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite. ³⁰ Ie muidona omoimona ailluena irareside. Ie jira omoimona damierie fiodaite. ³¹ Cai comeciaina raise cai facajamona, jeacinona cai fainonocaia, Jusiñamui caina duere finoite. ³² Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiena

ñnoñedina duere finoite. Naimaci diga cai duere sefuiñellena, birui caina duere finode.

³³ Cue amatiai, Cristo fiodailla rafuena omoï comecillena omoï ofia, daacaiño omoï guillesa, jiaïno riñedina seda. ³⁴ Bu eo aimetaia, jofomo nano guilla. Guillanona omoï ofillinomo bi. Dani coniniri raise omoï guiacaiñenia, Jusiñamui omoïna duere finoï raillano, jofomo guiño. Nana naie rafuena nia lloñedicue; iadedi omoï dine dane cue ia, iena lloiticue.

12

Cristo facaina raise maijillena, Jusiñamui Joreño naga creyentena canode

¹ Cue amatiai, jiaie rafuena cuemo jai jicanotomoï. Iena ja ñaiticue. Jusiñamui mona diga uaina feiñoticaï. Naimiemona naimie facaina maijia uaina feiñoticaï. Naimie facaina cai maijillena, jiaie creyentiaina cai canollena, naimiemona cai oga uaina ñaiticue. Iena omoï raise uiñuana jitaidicue.

² Ero, Cristona nia omoï ñnoñenia, Jusiñamuiñedimiede jiraraina sedauidomoï. Iedo jaie tainodo jai-jaisoidomoï. Taife iedo omoïna jifuate. ³ Ie jira biena omoï raise uiñuana jitaidicue. Jusiñamui Joreño uaido nie creyente ñaia, Jesús Joreño na jeare ñañeite. “Jesúdi Jusiñamui Jitoñede” rañeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese rañedina cacareiño.

⁴ Jusiñamui Joreño caimo jai illa jira, Jusiñamui Joreñomona cai maijia uaina oticai. Naga creyente daje isoi oñedicaí. ⁵ Naga creyente Cristo facaina daje isoide uai diga maijiñedicaí; iadedi Cristo facaina nana maijidicaí. ⁶ Jusiñamuidi diga uai llua motomo naga creyentena maijitate, naimie jitailla rafuena naimaci finollena. ⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticaí. ⁸ Damierie creyentemo Cristo rafue jino lolle uaina itatate. Damierie creyentemo Cristo rafue llofuelle uaina itatate. ⁹ Damierie creyentemo Jusiñamui siño rafue finuana inotaja uaina itatate. Damierie creyentemo duidinona jillotaja uaina itatate. ¹⁰ Damierie creyentemo siño rafuena finua uaina itatate. Damierie creyentemo jino lolle uaina itatate. Naimacimo Jusiñamuidi ie rafuena llocabite, jianomo jino lollena. Dajerie creyentemo uaina itatate, nie isoide uaido Cristo rafuena railla lloraima llua uiñollena. Jusiñamui Joreño uaido nie lloraima lloia, iena uiñote. Taife uaido nie lloraima lloia, iena jiaí uiñote. Damierie creyentemo naimaci uiñoñega uaido ñaia uaina itatate. Damierie creyentemo naie uiñoñega uai oni dobañolle uaina itatate, comini iena raise uiñollena. Iena naimaci nia dobañonena, iena jiaí raise uiñoñedimaci. ¹¹ Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

Cristomo dajena duidicaí

12 Cai abımo dıga ra ite. Cai jefo ite. Cai uısı ite. Cai onolli ite. Cai eılli ite. Dıga ra ite; iadedı cai abıdı jaca dajede. Dajemo duide. Ie isoide. Dıga creyentııdıcaı; iadedı dajena Cristomo duıdıcaı.

13 Dama Jusıñamui Joreñodı dajena Cristomo nana creyentııdıcaıdı duıdıcaı. Dajerie judııaıdıcaı; dajerie judııaıñedıcaı; dajerie patrón anamo itıcaı; dajerie patrón anamo ñedıcaı. Dıga nairaııdıcaı; iadedı dajena Jusıñamui Joreña nana feıñotıcaı.

14 Cai raise majıllena, cai raise illena, cai abımo dıga ra ite. Naga ra dama oni eneno inide. Ie isoide. Cristomo dajena cai duıllanona, dıga creyentııdıcaı; iadedı Cristo facaina dajena majıdıcaı. 15 Ero, cai abımona cai eılli nıbaı facaite: “Onolli isoıñedıcue. Onolli cue baıfemo faıte. Bie abımo duıñedıcue” facaite. Iese facaıa, jaca iese ñede. Cai abımo jaca duide. Onolli eılli baıfemo faıñede. Dafocni ite. 16 Ero, cai jefo nıbaı facaite: “Uısı isoıñedıcue. Uısı cue baıfemo faıte. Bie abımo duıñedıcue” facaite. Iese facaıa, jaca iese ñede. Cai abımo jaca duide. Uısı jefo baıfemo faıñede. Ie isoide. Dajena Cristomo omoi duılla jira: “Jıaıme baıfemo itıcue” raıñeno. Jıaıe creyentena abına uradoıñeno. 17 Ero, dama uısı cai abımo itena, cai jefo ñedena, jıaıe ra cai abımo ñedena, ¿nıese rana cacatıcaı? ¿Nıese niadedı ra sorıllana cacadıcaı? Ie isoide. Dajena Cristomo omoi duılla jira, naga creyentena jıtıdomoi, Cristomo dajena ĩnocana omoi jaıllena. Jıaıe creyentena uaitaıñeno. 18 Jusıñamui cai abımo dıga rana comuitate. Naimie jıtıılla isoı, cai abımo naga rana comuitate. 19 Cai abımo dıga ra ñedena, ¿buedo cajenıtıcaı? 20 Dıga ra cai abımo ite; iadedı jaca

dajede cai abi.

²¹ Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comei ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena iinocana jail-lana jitaidicai. Jiaie creyentemona abina iedoñeno.

²² Naga cai abimo ite rana jitaidicai, raise cai illena. Naga cai abimo ite ra jiaie ra baifemo iñede. Nana daje isoi itena, mare; ²³ iadedi dajerie ra ebire eruaillena, cai abi jifollena, iniroina jitaicai. Meiruiñellena, cai abi bainillena, iniroina jiaí jitaicai. ²⁴ Cai uiecomo meiredino iñena jira, iena jifoñedicai. Ero, Jusiñamui cai abina finode. Dajerie ra jiaie ra baifemo iñede. ²⁵ Jusiñamuidi naga cai abimo ite ra dajena maijiana itatate. Dajena maijicana jaide. ²⁶ Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicai. Ie isoide. Cristomo dajena duidicai. Jiaie creyente duere sefuia, naimiena cai canoia, Cristo dibeimo caimare marena iticai. Naimiena cai canoñenia, caimare marena iñedicai.

²⁷ Ero, caidi naimie cominina jira, Cristomo dajena nagasaiaí duidicai. ²⁸ Ie jira Jusiñamuidi naimiena iinotinomona damieriena nano fetu-anona, Cristo naimacina oretate, ie rafuena llo-l-lena. Ie mei jiaínona fetode, naimacimo ie rafuena llua mei, jiaínomo ie rafuena jino llo-l-lena. Jiaínona fetode, ie rafuena llofuellena, cominina ie rafuena raise uiñotallena. Jiaíno ie uaina itatate, naimie facaina naimaci maijillena, jiaie creyentiana naimaci canollena. Damierie

creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena. ²⁹ Ero, Jusiñamui nana omoina fetode, ie rafuena jino lollena. Damieriena fetode. Nana omoina fetode, ie rafuena llofuellena. Damieriena fetode. Nana omoina fetode, siño rafuena finollena. Damieriena fetode. ³⁰ Nana omoina fetode, duidinona jilloitallena. Damieriena fetode. Nana omoina fetode, omoi uiñoñega uaido ñaillena. Damieriena fetode. Nana omoina fetode, naie uiñoñega uai jino dobaiñollena. Damieriena fetode. ³¹ Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoimo illena, Jusiñamuimo jica; iadedi jiaie rafuena omoi ollena, omoimo lloiticue. Nana jiaie rafue baifemo ite. Jiaie cominina omoi isiruillena lloiticue.

13

Nana jiaie cominina cai isiruillafue

¹ Cai uiñoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruiñenia, jamai ñaiafuena ñaiticaí. ² Jusiñamui rafue jino lolle uaina caimo ia, nana Jusiñamui cana uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo ñnoia, cominina cai isiruiñenia, Jusiñamuimona jamai bue isoidicaí.

³ Jiaie cominina cai canollena nana caimo ite rana cai fecaia, Cristo rafuena cai lollena cai niadi fiolaiacania, cominina cai isiruiñenia, jaca buena oñedicaí. Jusiñamuina jaca iobitañedicaí.

⁴ Cominina cai isiruia, naimaci diga raire iciriñedicaí. Naimacina canocabidicaí. Naimaciri abina uradoiñedicaí. Abina birioicaiñedicaí.

⁵ Cominina cai isiruia, abina iedoñedicaí. Naimacimo cai comeciaina facacabidicaí. Cai rana caidicabiñedicaí. Naimaci diga iciricabiñedicaí. Naimaci caina jeare finoia, ibana ocabiñedicaí.

⁶ Cominina cai isiruia, naimaci jeare finoca rari iobicabiñedicaí. Naimaci uanai mare finoca rari iobicabidicaí. ⁷ Cominina cai isiruia, naimaci caina duere finoia, ibana ocabiñedicaí. Cai joreña bu ñaia, caina taino lloia, iena ñnocabiñedicaí. Cai marena illamo ocuridicaí. Cai comeciaina ocuiñocana jaidicaí.

⁸ Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite.

⁹ Nana Jusiñamui caina uiñotagacinona nia raise cacaiñedicaí. Nana Jusiñamui rafuena nia raise jino lloñedicaí; ¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticaí. Naimiemo ite rafuena jiaí raise uiñoiticaí.

¹¹ Jiaie rafuedo iena llofueticue. Jaiie nia cue uruenia, urue isoi ñaiticue. Urue isoi comecina facadicue; iadedi eimienna cue jaillamona, urue isoi jaiñedicue. Cue uruenamona ite rafuena

fainonocaidicue. Eimie comecina facajacinodo birui jaidicue. Urue isoi Jusiñamui rafuena birui janore uiñoticai; iadedi monamo cai ia, eimie isoi iena raise uiñoiticai. ¹² Ero, jacaie acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicaí. Iena raise cacaiñedicaí; iadedi Cristona ico cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jai raise uiñoiticue. ¹³ Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacinodo jai abina ñnoticaí. Naimie llogacino suillemo jai ocuiridicaí. Jusiñamuina cai isiruillamona, jiaie cominina jai isiruiticaí. Naie isiruillacino jiaicino baifemo faite. Ie jira coninina isiruicana omoi jai.

14

Omoi uiñoñega uaido omoi ñaia rafue

¹ Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina uanido. ² Ero, omoi uiñoñega uaido ñaia uaina omoi ñaicabia, jaca buna omoina cacaiñena jira, cominina canollena ñañedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciainona ñaitomoi. ³ Jusiñamui rafuena jino omoi lloia, cominina canodomoi. Naimacina Jusiñamuina ñnotadomoi. Naimie dibeimo raise itatatomoi. Naimaci comeciaina ocuiñotadomoi. ⁴ Nana creyentiaina canodomoi; iadedi naie uiñoñega uaido omoi ñaia, dani omoi comeciaina canodomoi.

5 Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiai iena raise cacareillena, iena omoi oni dobaiñoia, cuemona jiai mare. Ie mei naie ñaiamona, Jusiñamui rafuena naimaci cacajamona, creyentiaina canodomo. 6 Cue amatiai omoi dine cue jaiacanana uiñotomo. Omoi dine cue ria, cue uiñoñega uaido cue ñaiticuedena, omoina canoñedicue; iadedi Jusiñamui cuemo jai lloga rafuena omoimo cue lloticuedena, omoina canodicue. Jusiñamui rafuena raise cue jai uiñua jira, omoina cue llofueticuedena, omoina jiai canodicue.

7 Ero, quena jamai tainuaido bu fia, ie figana uiñoñedica. Guitarra bu jamai tainuaido taia, ie taillana uiñoñedica. 8 Ejércitomo trompetana jamai tainuaido fia, soldaduai maijillena raise uiñoñedimaci. 9 Ie isoide. Cai cacaiñena uaido omoi ñaia, omoi ñaiana uiñoñedica. Iese omoi ñaia, jamai tainona ñaite isoí cacadica. 10 Eo ailluena nairai ite. Naga nairai ie uai ite dani naimaci ñaillena; 11 iadedi nie nairai ie uaina cue uiñoñenia, naimacimona jiaie nairai imiena eruaidicue. Cuemona naimaci jiaie nairaina eruaidimaci. Conini diga ñaiana cacaiñedica. 12 Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, dani conini Cristo rafuena inocana omoi jaillena. Jusiñamui Joreñomona dani daje uaina nicidoño; iadedi nana nicido.

13 Ie jira ie uiñoñega uaido bu ñaia, ie oni dobañua uaina naimiemo illena, jiaie creyentiaie iena cacaillena, Jusiñamuimo jicaja. 14 Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue. 15 Ie jira, ¿ñiese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue uaido jiai ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiai roiticue. 16 Iobillacinona Jusiñamuimo omoi fecajano, omoi uiñoñega uaido omoi ñaianona, ¿ñiese omoina cacaiñedino: “Jee” raitimaci? 17 Iobillacinona Jusiñamuimo raise fecadomoi; iadedi omoina cacaiñedinona Jusiñamuina uiñotañedomoi. Ie jira omoi uiñoñega ñaia uaina oni dobañotimie omoi roracomo iñenia, naie uaido ñaiñeno. 18 Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue; 19 iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona maraiñede.

20 Cue amatiaie, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca. 21 Jusiñamui facaina lloraïma micori jaie cuela: “Jusiñamui llote: ‘Cue comini dine jiaie nairaina cue oretajamona, cue cominina cuena

ñnotallena, naie jiaie nairai uaido cue cominimo lloiticue; iadedi iena jitaiñeitimaci. Cuenajaca uifioñeitimaci' llote". ²² Ie isoide. Uifioñega uaido omoi ñaiamona, Cristona ñnoñedino iena raise cacaiñedimaci; iadedi Cristona ñnotino iena cacadimaci. Iemona fueotimaci. Jusiñamui rafuena omoi llofuiamona, Cristona ñnoñedino iena cacajamona, Cristona ñnoñedimaci; iadedi Cristona ñnotinona canodomo. ²³ Danomo nana omoi ofia, omoi uifioñega uaido nana omoi ñaia, Cristona ñnoñedino iena cacajanona, omoina; "Uairico" raitimaci; ²⁴ iadedi omoi ofia, Jusiñamui rafuena omoi jino lloia, iena Cristona ñnoñedimie cacajamona, naimiedi jeacino naimie comecimo illana uifioite. Naie rafue naimiemo riire baite. ²⁵ Naimie comecimo ite jearede rafue naimie uifiuamona, Jusiñamuimo ie jeacinona lluanona, Jusiñamuina ñnoite. Ie muidona raite: "Uanai, Jusiñamui omoi motomo ite".

Roracomo omoi ia, raise marena omoi i

²⁶ Cue amatiai, rollena omoi oficabia, ¿niese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uifioñega uaido ñaite. Jiaimie naie uaina oni dobaiñote. Cristo ñibeimo creyentiana raise itatallena, nana omoi finua rafuena raise fino. ²⁷ Uifioñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñote. ²⁸ Naie ñaiana oni dobaiñotimie ifienia, naie uifioñega uaido ñaitimie roracomo ñañena; iadedi naimie ñaiacania, Jusiñamuimo

dama ie jofomo ñaia. ²⁹ Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino billana uiñuanona llua. ³⁰ Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire llucailla. Iemei jiaimie lloite. ³¹ Iese damierie nana lloito moi, naie lluamona Jusiñamui rafuena raise omoi uiñollena, omoi comeciai jiai ocuiñollena. ³² Naga llotimiedi ie uiñua diese llua na uiñote. Ie jira jiaimie nia lloia, iena cacarei. Iemei jiaimie llua. ³³ Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

³⁴⁻³⁵ Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jaie llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, marañede, nainomo ite jino lloraima uaina naiñaiñuai raise cacaiñena jira.

³⁶ ¿Ñiese cue llucinodo jaiacaiñedomoi? Jusiñamui rafue omoimona comuiñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena llote. ³⁷ “Rafuena Jusiñamui cuemo llote” omoimona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai

Namamona ite uaina omoimo cueticue” naimiedi uiñote; ³⁸ iadedi naimie iese uiñoñenia, Jusiñamui Joreñomona naimie uai iñenana uiñoiticaí.

³⁹ Cue amatiaí, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiaí ñaia, iena rairuiñeno.

⁴⁰ Omoí ofia, cue llua isoi, Jusiñamuina raise marena seda.

15

Fiodaillamona Cristo jai jillode

¹ Cue amatiaí, iena omoí feitañellena, bie rafuena dane lloiticue. Cristo ie mare rafuena omoína navui llofueticue. Fiodaillamona Cristo jilluana llofueticue. Cue llofuiacínona feiñotomoi. Iena ñnocana jaidomoi. ² Naiena omoí ñnuamona, Jusiñamui omoí jeacínomona omoína jillotate. Naiedo nia omoí jaia, iena raise omoí ñnoia, jai jillobidomoi.

³ Nanoca rafuena omoína llofueticue. Jiaie creyentiaímona buena jai cacadicue. Jusiñamui facaina lloraini micoriaí jaie ciegafuiaí isoi cai jeacino facaina Cristodi fodaite. ⁴ Raiafomo naimiedi jonega. Darui amani illanona naiemona Jusiñamuidi naimiëna jillotate, Jusiñamui facaina lloraini micoriaí jaie llua isoi. ⁵ Ie mei Pedro naimiëna ciode. Ie mei ie once llofueoicaigano naimiëna ciodimaci. ⁶ Ie mei quinientos naimiëna ñnotino naimiëna daruido ciodimaci. Naimacimona damierie jai fodaitimaci; iadedi ailluena nia fodaiñedimaci. Cristo jilluana uiñotimaci. ⁷ Ie mei Jacobo naimiëna ciode. Ie mei nana ie oretagano naimiëna ciodimaci.

⁸ Ie mei naimiēna jiaī ciodicue. Ie jira fiodaillamona naimie jilluana uiñoticaī. Ie doce llofueoicaigano fetua mei, diga años illanona, naimiēna nia cue uiñoñena facaise cuena fetode. Ie mei ie rafuena cue lollena, cuena oretate. ⁹ Ailluena creyentiaīna jaie cue duere finua jira, nana jiaie Cristo oretagano cue baifemo faitimaci. Jamai bue isoidicue; iadedi Cristo cuena fetode. ¹⁰ Jusiñamui cuena duenaillamona, Cristo oretagamienā jaidicue. Jusiñamui cuena jamai tainomo duenañede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue. ¹¹ Jiaie oretagano Cristo rafuena llofueia, iena cue llofueia, daje isoide rafuena llocana jaidicaī. Naie rafuena omoi cacajamona, iena ñnotomoi.

Fiodaillamona nana creyentiaī ico jilloitimaci

¹² Fiodaillamona Jusiñamui Cristona jillotajana llofuecabiticaī; iadedi omoimona dajerie raitomoi: “Fiodaillamona, nana comini imaci abiaī diga ico jilloñeitimaci”. ¹³ Ero, omoi llua isoi fiodaillamona comini ico jilloñedena, ie isoi Cristo jiaī nia raiafomo ite. Niade jilloñede. ¹⁴ Cristo jilloñenia, Cristo rafuena jai tainona lloticaī. Naie rafuena jiaī tainona ñnotomoi. ¹⁵ Cristo fiodaillamona Jusiñamuidi naimiēna jillotajana llofuecabiticaī. Fiodaillamona creyentiaīna ico Jusiñamui jillotañenia, Cristona jiaī niade jillotañede. Jusiñamui rafuena tainona jai llofueticaī. ¹⁶ Fiodaillamona nana creyentiaī ico jilloñenia, Cristo jiaī jaie jilloñede. ¹⁷ Cristo nia

jilloñenia, naimiena tainona ñnotomoi. Jusiñamui omoi jeacinona niadedi oni dotañede. ¹⁸ Cristona ñnuanona jai fiodaitinodi jiai jai faifidimaci. Jusiñamui illanomo jaca iñeitimaci; iadedi iraimo jaca iitimaci. ¹⁹ Nana cai ille dinori dani Cristo caina jilloitallemo cai ocuria; iadedi naimie jilloñenia, jai duere iticai. Jai tainomo ocuridicai.

²⁰ Ero, tainomo ocuriñedicai; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentiai jiai jilloitimaci. ²¹ Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicai; iadedi fiodaillamona Cristo jai jillua jira, fiodaillamona ico jiai jilloiticai. ²² Adán micorimona cai comuilla jira, nana fiodaicana jaidicai; iadedi Cristomo cai duilla jira, jilloiticai, naimie diga jaca cai illena. ²³ Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloiticai. ²⁴⁻²⁵ Ie mei naimie dinena nana naimie dibeimo iñedinona anafeditaite. Nana naimie dibeimo iñede joreñuaina jiai anafeditaite. Illaimana Cristo illamona, nana naimie dibeimo iñedinona anafeditaite. “O uai cuemo o illamona, nana o jitailla rafuena jai fuidodicue” ie Moomo lloite. ²⁶ Nana naimie dibeimo iñedino naimie anamo jai illa mei, Cristo muidona naimie comini jai jilluamona dane fiodaiñeitimaci. ²⁷ Jusiñamuidi nana cominina Cristo anamo itataite. Ie muidona creyentiaidicai dane fiodaiñeiticai; iadedi Cristo anamo Jusiñamui iñeite. Cristona oretaja jira,

Cristo anamo Jusiñamui iñede. ²⁸ Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiaí iite. Jusiñamui nanocamiēna jira, nana naimie finoca ra naimie anamo iite. Nana comini naimie anamo iitimaci.

²⁹ Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese inoñedomoi. Dajerie creyentiaí marena illamona, omoi mona dajerie creyentiaína jaidomoi. Naimaci jai fiodaitimaci; iadedi fiodaillamona ico jilluana inotimaci. Iena omoi inuanona, bautizagaomoi. ³⁰ Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fodaicabiticue? ³¹ Cue amatiaí, cai Nama Jesucristomo omoi duilla jira, omoiri iobidicue; iadedi nagarui niadedi fodaicabiticue. Cristo rafuena omoi mo cue llocabilla jira, jiaie comini iciritimaci. Icirillamona, cuena meineiacadimaci. ³² Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue lluamona jaca buena oñeiticue. Ie muidona fiodaillamona cai jaca jilloñeiticaídena, Cristo rafuena fainonocaida, ico raire jamai cai fiodailla jira, jamai ua jai jaicaillafuena cai jaiacaiticaí. Ie ia iese iñede. Cristo jai jillode.

³³ Ie jira omoi abiaína jifueñeno. “Jilloñeiticaí” railla comini diga omoi nabairia, naimaci llogacínodo jiaí jaitomoi. Ie muidona naimaci diga

nabairiñeno. ³⁴ Je jira raise abina uiñuanona, mai jai. Jeacnona finocana jaiñeno. Omoimona dajerie Jusiñamuina raise uiñoñena jira: “Jusiñamuidi cominina jillotañeite” raitimaci. Omoi meidailena, omoimo iese lloticue. Jusiñamui rafuedo raise mai omoi jai.

¿Niese creyentia jilloitimaci?

³⁵ Omoimona damie nibai jicanoite: “¿Niese fiodaillamona creyentiaidicai jilloitica? Naimaci abiai nibai jai rifaidimaci. ¿Nie isoide abiai diga dane iitica?” ³⁶ Iese bu jicanoia, raise comecina facañede. O illimo buena o ria, janore sicua meinocni, o riga radi jai abidi rifaide. ³⁷ Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaifo eruaide. O riga rana eruañede. ³⁸ Naga riara daje isoi eruañede. Jusiñamui jitailla isoi, jiaiforie eruaide. Je isoide. Naga fiodaitemie jillua mei, Jusiñamui jitailla isoi, ie abina jiaiforie itataite. ³⁹ Diga isoide cai abiaina Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellen, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaiforie eruaite abiaina finorede. ⁴⁰ Jusiñamui dine ico cai ia, cai abiai iite, nainomo cai illena. Bene cai abiai jiai ite, bene cai illena. Monamo cai ia, ebireniticai. Bene cai ia, jiai ebire iticai; iadedi daje isoi ebire iñedicai. ⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuai isoi lligaiñoñede. Naga ucuai daje isoi lligaiñoñede. Monamo cai ico illena, naimie jitailla diese cai abiai caimo iite.

⁴² Ie isoide. Fiodaillamona cai jillua mei, cai abiaï jiaïfo eruaïte. Cai fiodaillamona cai abiaï rifaide; iadedi cai jilluamona, cai abiaï dane jai rifaïñeite.

⁴³ Cai fiodaillamona cai abiaï jai ebinide; iadedi cai jilluamona, cai abiaï ebirenite. Fiodaicana cai jailla jira, cai abiaï birui raise mairiñede; iadedi ico cai jilluamona, cai abiaï mairite. Nana Jusiñamui jitailla rafuena finoreniticaï. ⁴⁴ Cai fiodaia, come abiaï isoi caïmo birui ite; iadedi cai jilluamona monamo ico caïmo cai abiaï jiaï iite. Enirue iena cai abiaï birui caïmo ite. Ie jira monamo cai jiaïfo eruaïte abiaï caïmo iite.

⁴⁵ Adán micori comuilla rafuena Moisés micori jaie cuega: “Jusiñamuidi nano comuidimie dofomo jafaicina firaiñuamona, naimie micori comena jaide” cuega. Naimiemona cai comuilla jira, fiodaiticaï. Fiodaillamona Cristo jillua jira, ico cai jiaï jilloille jira, caina jiaïfo eruaïte abiaïna ico itataite. ⁴⁶ Eniruemo birui cai illa jira, caïmo birui ite abiaï diga iticaï. Fiodaillamona ico cai jillua mei, monamo cai ia, jiaïfo eruaïte abiaï diga iiticaï. ⁴⁷ Adán micoridi enirue ie. Imuicimona Jusiñamuidi naimiena finode. Cristodi eniruemo billanona, imana jaide; iadedi Jusiñamui dinena monamona naimie bite. ⁴⁸ Imuicimona Adán micori finua jira, naimie fiodailla mei, dane imuicina jaide. Naimiemona cai comuilla jira, cai fiodaia, jiaï imuicina jaiticaï; iadedi Cristomo jiaï duidicaï. Cai jillua mei, naimie isoi ico iiticaï. ⁴⁹ Adán micorimona cai comuilla jira, naimiena eruaidicaï. Eniruemo Cristo jaie ia, naimie abi ite. Fiodaillamona naimie jillua mei, naimiemo jiaïfo eruaïte abi naimiemo ite. Cai jillua mei, Cristona

eruaiticai.

⁵⁰ Cue amatiaí, buena lloticue. Caimo jai ite abiaí diga monamo Jusiñamui ie cominina sedajanomo iñeiticai. Cai abiaí rifaila jira, cai fodailla fa-caise naie isoide abiaí diga nainomo jaca iñeiticai.

⁵¹ Ero, Jusiñamui cuena uiñotaga rafuena omoimo ja lloticue. Iena navui jaca uiñoñedicaí. Nana creyentiaídicaí fodaiñeiticaí; iadedi Jusiñamui cai abiaína jiaífo meidotaite. ⁵² Omoi uisi jarire cuiro-rilla isoi, iena ua raire meidotaite. Ie trompeta fillanona, jai fodaite creyentiaína Jusiñamuidi jil-lotajanona, naimaci abiaína meidotaite. Nia fodaíñedinodicaí cai abiaína jiaí meidotaite. Dane fodaíñeiticaí. ⁵³ Cai abiaí birui rifaiacade. Ie jira birui fodaicana jaidicaí. Jusiñamuidi cai abiaína ico meidoite. Ico monamo jiaífo abiaí caimo ia, cai abiaí rifaiñeite. Fodaíñeiticaí. ⁵⁴ Iese caimo suia, Jusiñamui facaina lloraima micorí jaie cuega uai jiaí suite. Cuega: “Nairuimona creyentiaí jaca fodaíñeitimaci”. ⁵⁵ Cai jaca illa jira, fodaicana jaiñeiticaí. Fodaillana jaciruiñeiticaí, dane cai fodaíñeiticaína jira. ⁵⁶ Jeacino illa jira, birui fodaicana jaidicaí. Moisés micorí jaie llogacino illa jira, iena cai raise finonina jira, jeacino caimo illana uiñoticaí; ⁵⁷ iadedi cai jeacino facaina cai Nama Jesucristo fodailla jira, jeacino anamo jai iñedicaí. Cai fodailla mei, dane fodaíñeiticaí. Jusiñamui caína iemona jai jillotate. Ie muidona naimieri cai iobillasa.

⁵⁸ Cue amatiaí, fodaillamona nana creyentiaí ico jillua jira, Cristo rafuena ñnocana jai. Naganomo iñeno; iadedi Cristo rafuena llocana omoi jai. Naimie jitailla rafuena finocana

omoi jai. Naimie facaina omoi maijia, tainona maijinedomoi. Naiemona diga mare rafue comuite. Iena jai uiñotomoi.

16

Jerusalémo itinomo ucubena oredimaci

¹ Jiaie rafuena cuemo jicanotomoi. Jerusalémo ite creyentiaimo ucubena oretaiacadomoi. Galaciamo ite creyentiaimo cue llua isoi, omoi mo lloiticue. ² Naga domingo omoi ucubemona daje diese eneno oni eeno. Omoi maijia bailla diese ucubemona cue bille dinori iena eeno. Iese naga domingo omoi eenoñenia, ico cue bia, ¿niese dacaiño ofrendamo ailluena ucubena joneitomoi? ³ Omoi dine cue rilla mei, omoi eenoga ucubena uillena, Jerusalémo ite creyentiaimo omoi fetocanona oretaiticue. Cartana jiai oretaiticue, omoi fetocano mareuidinona Jerusalémo itino uiñollena. ⁴ Jerusalémo cue comeci jiai jaiacania, cue diga jaitimaci.

Pablo jai macariacade

⁵ Macedonia railla eniruemo nano jaiticue. Creyentiaina cioillena, dajerie nairaimo jaiticue. Ie mei omoi dine jaiticue. ⁶ Diga irui omoi diga nibai iiticue. Nana rollime facaise omoi diga nibai iiticue. Nibai daje amani fivui iiticue. Ie mei cuena omoi canollemona oni jaiticue. Omoi dinomona cue jaia, cue jaillinona nia uiñoñedicue. ⁷ Omoi dine birui nia jaiñeiticue. Omoi dine birui cue jaia, dallu omoi diga iiticue; iadedi jaiiruido omoi dine cue jaia, cai Nama jitaia, omoi diga are iiticue. ⁸ Beno Efesomo nia iiticue. ⁹ Beno diga

comini Cristo rafuena cacaacadimaci. Naimacimo iena llofueiacadicue. Diga comini cue lluana uai-tatimaci. Cue lluana jitañedimaci Ie jira bene nia lloiacadicue. Pentecostés railla rafue fuille mei, jaiticue.

¹⁰ Omoi dine Timoteo ria, naimiena raise marena nafue. Cue isoi cai Nama facaina naimie maijicabide. ¹¹ Ie muidona naimie lluacinona jamaiñeno. Omoimona naimie jaiacania, cue dine abido naimie raise rillena, naimiena raise cano. Naimie jaiacania, naimie caimare caimaduano oreta. Jiaie creyentiai diga naimie billemo ocuridicue.

¹² Apolona jicanotomoi. Jiaie creyentiai diga omoi dine naimie jaillana naimiemo lloticue; iadedi naimie comeci nia jaiacaiñede. Jiairuido abi juarenia, omoi dine jaite.

Fuiduacino

¹³ Jeacinomona abina rairui. Cristo rafuena ñnocana omoi jai. Eimie isoi omoi comeciaina ocuiño. ¹⁴ Jiaie cominina omoi isiruillamona, nana omoi finoacalle rafuena fino.

¹⁵ Cue amatiai, Acaya railla eniruemo Estéfanadi, ie comini diga, nano creyentiaidimaci. Iena uiñotomoi. Naimaci jitailla jira, jiaie creyentiaina canocabidimaci. ¹⁶ Naie isoidino lloga uaina cacarei. Naga Cristo dibeimo maijidino uaina cacarei. Iedo omoi jai. ¹⁷ Omoimona cue dine Estéfnas bite. Fortunato diga, Acaico diga naimie billa jira, iobidicue. Cue dine iñedomoi; iadedi naimaci billa jira, omoi isoi cuena canodimaci. ¹⁸ Naimaci billamona cue comeci caimataide.

Omoï comeciã jiaï caimataide. Naie isoidinomo: “Marena maijidomoi” omoi railla.

¹⁹ Diga creyentiaï Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiaï orediaïmaiaï. Iaïmaiaï jofomo dajerie creyentiaï rocabitimaci. Cristomo naimaci duilla jira, omoïna isiruillanona, nana naie creyentiaï imaci uaina jiaï oredimaci. ²⁰ Nana bene ite creyentiaï imaci uaina oredimaci. Nana creyentiaïna eo caimare uaido.

²¹ Omoïmo cue uaina jiaï oredicue. Cuena canolena, naimiemo cue llua isoi, jiaïmie bie carta cuega; iadedi cue mameci bene dama cueticue. Nana iena ïno. Pablodïcue.

²² Omoïmona Cristona bu isiruiñenia, Jusiñamui naimiena duere finollesa. Cai Nama abido dane billesa.

²³ Cai Nama Jesús omoïna duenaïllasa.

²⁴ Jesucristomo cai duilla jira, omoïna cue isiruïllana omoi uiñuana jitaïdicue. Mai. Macaïbaite.

**Jusiñamui uai: Jusiñamui jito rafue illa
rabenico**
**New Testament in Huitoto, Murui (PE:huu:Huitoto,
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022

145a1f66-dca1-5de3-9c00-4e533605e488